

# ALL NATIONS GOSPEL PUBLISHERS



[www.angp-hb.co.za](http://www.angp-hb.co.za)



[info@angp.co.za](mailto:info@angp.co.za)

# ANG TAGIPUSUON SANG TAWO

Ukon

## Ang Espirituhanon nga Espejo sang Tagiposoon (Napahayag nga Palanganinawan sa Napulo ka laragway)

Ining diotay nga tolon-an upod sang iya mga pa-athag nagsugod sa Francia sang tuig 1732. Gintawag sadto nga “Espirituhanon nga Espejo sang Tagiposoon”, ukon “TOLON-AN SANG TAGIPOSUON” kag upod sang iya madalum nga gikan sa Kasulatan nga kamatooran kag kapuslanan, nangin-sadto kag tubtub karon, naglapnag sa daw bug-os nga hambal sang Europa subong man sa madamu nga mga hambal sa Afrika, kag sa gihapon ginabasa sa tanan nga sahi sang tawo kag sang tanan nga tinoto-ohan.

Madamu ang nakaambit sang kamatooran sang mga panaad sang Dios sa Da-an nga Katipan, nga nagkalatuman sa Bag-o, “Hatagan Ko kamo sing bag-ong tagiposoon, kag ibutang Ko ang Espiritu nga bag-o sa sulod ninyo.” (Eze. 36:26; Heb. 8:10).

**J.R. GSCHWEND**

---

**COPYRIGHT**

**ISBN 0 - 908412 - 51 - 7**

**ALL NATIONS GOSPEL PUBLISHERS**

**P.O. Box 2191, PRETORIA, 0001, R.S.A.**

(A Gospel Literature Mission financed by donations)

(Reg. No. 1961/001798/08)

Ang tagsa nga nagapakasala nagalapas man sang kasogoan; kay ang sala amo ang paglapas sang kasogoan.

Nahibaloan ninyo nga Sia nagpahayag sa pagkuha sang mga sala, kay walay sala sa Iya.

Ang bisan sin-o nga nagapabilin sa Iya wala nagapakasala; ang bisan sin-o nga nagapakasala wala makakita sa Iya ukon makakilala sa Iya.

Mga anak, indi kamo pagpatalangon ni bisan sin-o. Ang nagahimo sing matarung amo ang matarung, subong nga Sia matarung.

Ang nagapakasala iya sang yawa; kay ang yawa nagpakasala kutub sa ginsuguran. Sa sining katuyo-an nagpahayag ang Anak sang Dios agud malaglag Niya ang binuhatan sang yawa.

Ang bisan sin-ong natawo sa Dios wala nagapakasala; kay ang kinaugali sang Dios nagapabilin sa iya, kay indi sia makasala kay sia natawo sa Dios.

Sa sini ginpahayag ang mga anak sang Dios, kag ang mga anak sang yawa; ang bisan sin-o nga wala nagahimo sing matarung indi iya sang Dios, amo man ang wala nagahigugma sa iya utud.

(1 Juan 3:4–10)

# ANG TAGIPUSUON SANG TAWO

## TEMPLO SANG DIOS UKON PAMANDAYAN NI SATANAS

(1 Juan 3:4–10)

Sa ikaw nagabasa sining tolon-an, kon mahimo ipahamtang gid sa imo painoino, nga ini, subong sang isa ka espejo ukon salaming sa diin makita nimo ang imo kaugalingon. Bala ikaw hentil ukon isa na ka Cristohanon, ditumuloo ukon nag isul, talupangda ang imo kaugalingon subong nga ikaw ginatolok sang Dios. “Ang tawo nagatolok sa nagowa nga dagway, apang ang Ginoo nagatolok sa tagiposoon.” (1 Sam. 16:7). Ang Dios walay ginapasulabi sa mga tawo.

Si Satanás amo ang amay sang tanan nga butigon. Sia amo ang principe sang kadudulman kag dios sining kalibutan, nga nagabalhin sang iya kaugalingon sa pagka-manugtunda sang kapawa agud sa pagdaya sang lalaki kag babayi. Sa sining mga inadlaw, subong man sang sa unang panahaon, may madamu nga butig nga mga pinadala kag mga madaya nga mga manugpangabudlay, nga nagapakonokono nga sila mga pinadala ni Cristo. Kag indi katingalahan, kay si Satanás nagabalhin sang iya kaugalingon sa pagkamanugtunda sang kapawa (II Kor. 11:13, 14). Si Satanás, ang dios sining kalibutan, nagabulag sang mga mata kag painoino sang mga tawo agud indi sila makatalupangud nga ang Dios nagahigugma sa ila ukon si Jesus nanginmatay sa pagluwas sa ila. Ang tanan nga mga makasasala kag ditumuloo mga patay kag mga bulag sa Dios. Ginagamhan sila sang espiritu sang dios sining kalibutan (Epeso 2:2). Luwas lamang kon ang ila mga mata mabuksan sa bisan ano man nga paagi sa ila nadula nga kahimtangan, sila tanan nagapadolong sa ila walay katapusan nga kalaglagan. Ang bisan sin-o nga magsiling, “Wala ako sing sala” nagadaya sang iya kaugalingon. “Sa sining katuyoan nagpahayag ang Anak sang Dios agud nga malaglag Niya ang mga binuhatan sang yawa.” “Busa magpasakup kamo sa Dios. Sumpunga ang yawa kag magpalagyo sia sa inyo. Magpalapit kamo sa Dios kag Sia magpalapit sa inyo.” (Santiago 4:7, 8).

Sa ikaw nagabasa sining tolon-an kag nagatoon sang iya mga laragway, mahimo nga makita nimo ang kahimtangan sang imo tagiposoon. Tuguti ang masusihon nga kapawa sang Dios sa pagpahayag sa imo sang kahimtangan sang imo tagiposoon. Kilalaha ang imo mga sala kag indi

pag-ipanghiwala sila kay ang polong sang Dios nagasiling sa aton nga, “Kon igtu-ad ta ang aton mga sala, matutum kag matarung Sia, kag magapatawad sang aton mga sala kag magatinlo sa aton sa tanan nga pagkadimatarung.” (1 Juan 1:9). “Ang Dugo ni Jesu-Cristo nga Anak sang Dios, magatinlo sa aton sa tanan naton nga sala.”

Ikaw ginagamhan ni Satanas ukon sang Dios; ikaw ulipon sang sala ukon ulipon sang Dios. Kon ang sala nagagahum sa imo kabuhi, indi pagipanghiwala ina, kondi maghibi kag magpanawag sa Dios. Sia magahilway sa imo paagi sa kay Jesu-Cristo nga nagkari sa sining kalibutan sa pagluwas sang makasasala, sa pagbugras sang gahum ni Satanas kag sang sala sa aton. Sia nagtubus sa aton. Yara ikaw sa atubangan sang balaan nga Dios nga nakakita sang tanan nga tinago, mga tinago nga panghunahuna kag mga binuhatan sang imo kabuhi. Mabudlay gid ang pagtago sang imo kaugalingon kag sang imo mga binuhatan sang imo kabuhi sa Dios kay “Ang nagbutang sang idulungog indi bala Sia makabati magpamati? Ang naghuman sang mga mata, indi bala makakita?”

“Kay ang mga mata sang Ginoo nagapanoloktolok sa bug-os nga duta sa pagpakita nga Sia mabakud tungod sa ila nga may tagiposoon nga himpit ayon sa Iya.” (II Koronika 16:9).


“Kay ang Iya mga mata yara sa mga dalanon sang tawo, kag nakita Niya ang tanan nila nga mga tikang, wala sing kadudulman ukon pitipit nga kadulum diin makapanago ang mga manughikot sang kalautan” Job 34:21, 22).

“Apang si Jesus wala magsalig sa Iya kaugalingon sa ila, bangud nga nahibaloan Niya ang tanan nga tawo” (Juan 2:24).

Gani “bulahan sia nga ang iya paglalis ginpatawad, nga ang iya sala gintabunan. Bulahan ang tawo nga wala pagpasangti sang Ginoo sang kalautan nga sa iya espiritu walay limbong” (Salmos 32:1, 2). Basaha ang Salmos 51. Si Jesus nagapanawag gihapon, “Kari sa akon, tanan kamo nga ginabudlayan kag ginabug-atan kag papahuwayon Ko kamo” (Mateo 11:28).

## KASAYSAYAN SANG MGA LARAGWAY Naha-una nga Laragway

Ini nga laragway nagapahayag sang tagiposoon nga kalibutanon, wala-natawo-liwat nga lalaki kag babayi, ginasiling sa Biblia nga makasasala, amo ang, isa nga ginagamhan sang espiritu sining kalibutan kag



### 1. ANG TAGIPUSUON SANG MAKASASALA

sang mga madamu nga handum kag paghingamu nga mainit sang unod. Ini amo ang totoo nga laragway sang tagiposoon sono sang pagtanaw sang Dios. Ang nagapalarok kag nagapula nga mga mata nagapahayag sang kahulogbon nga ginapahayag sa Hulubaton 21:29-33; “Sin-o bala ang may pagkakailo? Sin-o bala ang may kasubo? Sin-o bala ang may mga pilas sa walay kabangdanan? Sin-o bala ang mga



may kasuavon? Sin-o bala ang may pagyamo? Sin-o bala ang may nagapalamula nga mga mata? Ang mga nagapabilin sing madugay sa alak, ang mga nagakadto sa pagpangita sing alak nga sinimbog. Dili ka magtolok sa alak kon mapula ini, kon ini nagaigpat sa tagayan kag naga-ilig ini sing matanlas. Sa katapusan nagakagat ini kaangay sang man-ug. Ang imo mga mata makakita sang mga makatilingala nga mga butang, kag ang imo tagiposoon magamitlang sing mga balingag nga mga butang.”

Sa ubos sang olo sa sining laragway, ang tagiposoon sang tawo makit-an nga ginapuy-an sang nanarisari nga mga kasapatan nga nagapahayag sang madamu kag nanarisari nga mga sala sa tagiposoon sang tawo, subong nga ang tagiposoon duog nga puloy-an kag hulukmungan sang aton mga sala. Ang Dios nagasiling sa aton paagi sa baba sang Iya manalagna nga si Jeremias nga nagasiling, “Ang tagiposoon malimbo-ngon labaw sa tanan nga butang, kag lakas gid kalaut sin-o bala ang makahibalo sini?” (Jeremias 17:9). Si Jesus, sa Iya kaugalingon nagpamatuud sini sa pagsiling. “Kay gikan sa sulod, gikan sa tagiposoon sang tawo, nagagowa ang malaut nga mga hunahuna, pagpakighilawas, pangawat, pagpatay, pagpanglahi, kaibog, kalautan, kaulag, limbong, kahisa, pasipala, palabilabi, kabuangan. Tanan ining malaut nga butang nagagikan sa sulod, kag nagadagta sa tawo” (Markos 7: 21-23)

1. Ang Pavo (Peacock) Samtang ang katahum sang pavo (peacock) ginadayaw kag ginakaila-an sang tanan, sa tagiposoon sang tawo, nagapahayag sang sala nga bugal. Si Lucifer, ang hinaplas nga kirubin, ang manugdala sang kapawa sang Dios, ang manugtunda sang Dios, nahulog bangud sang bugal kag niyan nahimo nga kaaway sang Dios — ang Yawa. (Isaias 14:9-17); Ezekiel 28:12-17).

Ang bugal nagikan sa buho gid sang Infierno, kag nagapahayag sa madamu nga bagay. Ang iban nga tawo nagapabugal sila sang ila mga manggad, sang ila mataas nga tinon-an; binag-o nga pamayo nga sa sina ginapagowa nila ang ila nga lawas sa makahuluya nga bagay; ang paggamit sang mga nagalinagting nga mga huluyason, pulceras, sing-sing, aretos, kbp. subong sang sinaysay ni Isaias 3:17-24. Ang iban nagapabugal sang ila mga ginhalinan ukon mga katigulangan, pungsud, cultura, pagkahumalampang kbp., nga nagakalimot nga ang “Dios nagasumpong sang mga bugalon, apang nagabugay sa mga mapainubuson.” (1 Pedro 5:5). “Ang Dios nagadumut sang bugal kag palabilabi”

(Hulu. 8:13). “Ang bugal nagauna sa kalaglagaan, kag ang palabilabihon nga espiritu nagauna sa pagkapukan.” (Hulu. 16:18).

2. Ang Kanding — Nagapahayag sang unodnon nga mga handum, pagkamalaut, panghilahi, panghilawas. Ang mga nasambit sa ibabaw nga mga sala nagasagsag sa sining binag-o, apang katapusan nga mga adlaw, sa isa ka kahimtangan nga aton dapat nga pagbatonon ang mga polong ni Jesus sang nagtagna Sia, malapit na sa 2,000 ka tuig nga nagligad, nga ang katapusan nga mga inadlaw manginsubong sang sa kaadlawan sang Sodoma kag Gomorrah. Indi lamang ining binag-o nga espiritu naghugakum sang mga lalaki kag mga babayi kag nakapanagil-ot sa mga panimalay kag mga puluy-an sang mga religioso nga mga tawo, mga katilingban, bulutho-an, mga hotel apang ang mga nagapalaut nga mga binhi nasab-ug sing makahuluya kag yawan-un nga kamangtas sa mga tagiposoon sang katawohan paagi sa mga cine, teatro, disco. TV, mahigko nga mga balasahon, kag madamu pa nga iban pa nga paagi, nga ang mga ginatawag sang Dios nga mga sala ginakabig lamang nga moderno nga pagsinalayo. Minilion sang mga pamatan-on nakahaman sing paghangup nga ang mataas nga pagkabuhi nagagikan sa mga cinehan kag mga sugilanon, lamang nga masapwan nila ang ila kaugalingon nga nagtupa sa gamo kag kahuluy-an kag pagnulsul. Ang malaut nga pagpagusa nga kabuhi sang mga gumulowa sa cine lalaki kag babayi nanginililogon sang mga pamatan-on. Ang mga balay-cinehan sa masunsun pugaran sang mga kalautan. Ang tigbatas sang Dios sa kaputli, subong kay Jose (Gen. 3) kag iban pa, wala na ginahimo nga huwaran. Bisan pa gani ang pagano, walay tinon-an nga tigulang sa Zulu, magapatay sang makihilawason lalaki kag babayi, makatudlo sang aton kono nga civilizado nga kaliwatan sing ano man nga bagay kag makasumbong batok sa aton sa katagudilian sa adlaw sang paghukum. Ang Dios nagsiling sa aton nga dimaghampang sang pagpanghilahi kondi sa pagpalagyo. “Ang tagsa ka sala nga iban nga ginahimo sang tawo nahagowa sa lawas; apang ang makihilawason nagapakasala batok sa iya kaugalingon nga lawas; ‘Nga-a? “Wala bala kamo makahibalo nga ang inyo lawas templo sang Espiritu Santo nga yara sa inyo, nga inyo nabaton gikan sa Dios? Indi na kamo inyo?” (1 Kor. 6:18, 19) “Ang bisan sin-o nga tawo ukon babayi maglaglag sang templo sang Dios ang Dios magalaglag sa iya (sa ila). Kay ang templo sang Dios balaan, kag inang templo amo kamo” (1 Kor. 3:17).



3. ANG BABOY – Nagapahayag sang mga sala sang pagpahobog-hobog kag pagkapalakaon. Sia mahigko nga sapat, nga nagakaon sang tanan nga iya ma-agyan, mahigko ukon matinlo, kag sa amo man ang makasasala nga tagiposoon nagalamon sang tanan nga malaut nga ginatan-ay sa iya, mahigko nga halambalanon, mahigko nga laragway, mahigko nga balasahon, kbp. Ang lawas, gintuyo nga templo sang Dios, ginalaglag sang mahigko nga kalan-on kag mahigko nga pamatasan subong sang pagtabako ukon maskada sang tabako, ang paggamit sang apian kag makahalit nga mga druga kag tabletas kbp. Ang batasan sang pagtabako kag bisan pa sang “Apian” nahugakum sang lalaki kag babayi karon labi sang sa una. Ang gahum lamang sang Dios ang sarang makahilway sa ila, mga makaloolooy nga ulipon sang tabako kag sang yawa . . . Samtang ang mga mahuyogon sa pagtoloohan nga mga tawo indi magtabako sa sulod sang simbahan, nagakabig nga ina batok sa balaan nga duog, walay sapayan sila sa walay pangirakira, paagi sa sining mabaho nga tanum magahalit sang among totoo nga templo sang Dios, ang ila lawas. “Wala bala kamo makahibalo”, siling ni San Pablo, “nga ang inyo lawas templo sang Espiritu Santo, kag ang bisan sin-o (lalaki kag babayi) nga maglaglag sang iya sini nga lawas ang Dios magalaglag sa iya?” (1 Kor. 316, 17; 6:18, 19).

Ang mahakug nga tawo kalangil-aran man sa itololok sang Dios. Kita nagakaon agud magkabuhi; indi nga nagakabuhi sa pagpanginaon. Ang gutom maumpawan sa pagkaon sang makapa-ayo-lawas nga kalanon, apang ang mahakug masunsun magasinggit, taga-i ako, taga-i ako!.

Ang kahakug wala gid gina-ayawi, wala gid gina-ayawi. Sono sa kasogoan sang Daan nga Katipan ang mahakug kag palahubog pagabaton tubtub sa kamatayon. (Deut. 21:18-21). “Kay ang palahubog kag ang hakugan maga-imol; kag ang katuyo magapapanapot sa tawo sing lapat. “Apang ang kaupod sang mga hakugan nagapakahuya sang iya amay.” (Hulu. 23:21; 28:7). Dumduma ang ia ka tawo nga manggaraan, mahakug kag ulipon sang unodnon nga balatyagon, namatay kag sang didto sia sa enfermo natalupangdan niya nga ara sia sa indi masoy nga pagantus. Ang kalain sang paginum indi bagay nga paghambalon. Maayo lamang nga kabigon nga daw sa wala na lang. Apang ang Dios nagasugid sa aton sing tama kaathag sa Iya Polong nga wala sing palahubog nga makapanubli sang ginaharian sang Dios. Ang servesa

indi pagkaon, ini makamamatay nga ilimnon nga nagapa-aligolong kag nagahalit sang painoino ukon panumduman, agud nga ang naganinum sini nagahulag sing binuang. Indi na sila makatalupangud sang matadlong kag tiko nga bisan pa magapamatay, panuyo kag nagapinatyanay sila nga indi sila kontani maghimo sina. “Kay ang alak manuguligyat, ang ilimnon nga masingkal amo ang manugpagahud; kag bisan sin-o nga nagasayup sa sini indi maalam.” (Hulu. 20:1).

Sila nga nagahimo kag nagabaligya sang masingkal nga ilimnon angay nga nakasala sa atubangan sang Dios, kay ang Dios nagasiling, “Kailo ang mga gamhanan sa paginum sang alak, kag sa mga tawo nga makusug sa pagsimbog sing masingkal nga ilimnon.” (Isaias 5:22). “Kailo ang nagapainum sa iya isigkatawo sa imo nga nagadugang sang imo dalit sa iya, kag nagapahubog man sa iya.” (Habakuk 2:15). “Ang arpa kag ang biola, ang pandareta kag ang lantoy kag ang alak yara sa ila fiesta; apang wala sila magsapak sang buluhaton sang Ginoo.” (Isaias 5:12). “Dili kamo magtalang; bisan ang makihilawason, ukon diwatahan, ukon mga makahilahion, ukon babayin-on, ukon Sodomanhon, ukon mga makawat, ukon mga mahamkonon, ukon mga palahubog, ukon mga mapasipalahon, ukon mga malugos indi makapanubli sang ginharian sang Dios.” (1 Kor. 6: 9, 10)

Ang mga sala sang aton kalibutanon nga ugali maathag sila. Yari ang iban sa ila; Pagkamakihilawason, pagkahigko, pagkaulag, pagkadiwatahan, pagkababaylan, kaawayon, pagpinuyas, kaimon, kasingkal, pagbinahinbahin, katuhaytuhayan, herejia, pagkahisa, pagpahubughubog, magansal nga kinalipay kag ang kaangay sini. Ang nagahimo sini nga mga butang manginwalay duog sa ila sa ginaharian sang Dios. Gal. 5:19-21) “Busa indi kamo maghinubog sang alak, sa diin may pagpatuyang; kondi magpapuno sang Espiritu.” (Epe. 5: 16).

Si Jesus naghatag sining mga masonod nga mga pangagda sa mga ginauhaw: “Kon ang bisan sin-o nga ginauhaw, magkari sia sa Akon kag maginum sang tubig sang kabuhi nga walay bayad.” (Juan 7:37, 38). “Ho, ang tagsatagsa nga ginauhaw, kari kamo sa mga tubig; kag ang wala sing kuarta, kari kamo, kari kamo kag magbakal kag magkaon! Kari, magbakal sing alak kag gatas sa wala sing kuarta kag sa wala sing bili.” (Isaias 55:1). “Ang bisan sin-o nga maginum sang tubig nga Akon ihatag sa iya indi na gid paguhawon; ang tubig nga Akon ihatag sa iya mangintuburan sa sulod niya nga nagaibwal sa kabuhi nga walay katapusan.” (Juan 4: 14).

4. Ang BA-O – nagapahayag sang pagkauyaya, pagpatumbaya kag pagkadiwatahan. Dipagkamatinoohon subong sang sala sang pagkadiwatahan. “Ang handum sang matamad nagapatay sa iya kay ang iya mga kamut nagadumili sa pagpangabudlay, may dira nga nagahamkon sing hinakug sa bug-os nga adlaw.” (Hulu. 21:25, 26). Si Josue nagsiling sa mga anak ni Israel, “Indi kamo magpabuyanbuyan sa pagtag-iya sang duta”. Ang tawhanon nga kinaugali tama ka tamad kag mapinabuyanbuyan sa pag-angkon sang mga butang nga iya sang Dios. Si Jesus nagsiling, “Panir asug kamo sa pagsulod sa ganhaan nga makitid.” (Lukas 3:24). “Ang nagapangita makakita.” “Ang ginaharian sang langit nagaantus sang paglugos, kag ang mga malugos nagaagaw sini sa pakusog.” (Mateo 11:12).

Ang pabuyanbuyan kag katamad nahanungud sang kaluwasan kag espirituhanon nga kaayohan sang aton kalag magadol-ong sa aton kalaglagan. Nagapauntat sa aton sa pagpangamuyo, gikan sa pagpangita sang mga madalum nga mga butang sang Dios, sa pagangkon sang manggaranon nga mga panaad sang Dios; ini nagadol-ong man sa kalaglagan. Kon ang Dios maghambal sa imo, nga nagahangkat sa imo sa paghatag sang imo tagiposoon sa Iya subong, si Satanas nagahutik sa imo nga ugaling lang, ukon sa iban lang nga adlaw, ang amo, ahay indi na gid ina magabut; kag mamatay ikaw nga walay kaluwasan, kag walay Cristo. Ang Dios nagasiling, “Karon nga adlaw, kon mabatian ninyo ang Iya tingug, dili ninyo pagpatig-aha ang inyo tagiposoon.” (Heb. 3:7, 8). Pila sang mga tawo ang nawala bangud sang ila pagpaligad sang kaluwasan nga sa iban ng adlaw lang ugaling wala na ina nagaabut? Ang adlaw nga buas indi imo ina.

Ang tukiba sang pawikan ukon ba-o ginagamit sang babaylan sa paghimo sang buluhaton nga binabaylan, kag nagatudlo diri sang sala sa pagsalig sa, kag paghimo sang binabaylan, pagpamakut sang palaabuton ukon paghimalad sa baylo sang pagsalig sa Dios nga buhi. Ilabi na gid sa tion sang mga pagtilaw kag mga balatian, mga pagsumpong kag mga kalisud, ginasingan kita nga magpanawag sa Dios, Sia handa sa pagbulig sa baylo sa pagsalig sa kapalaran nga maayo ukon malain; kay “Ang Ginoo nagapalig-on sang mga paglakat sang tawo.” Salmos 37:23). “May ara bala sa inyo nga nagaantus? Magpangamuyo sia. May malipayon? Mag-amba sia sa pagdayaw. May nagamasakit bala sa inyo? Magtawag sia sang mga tigulang sang iglesia kag panga-

muyoan nila sia, nga ginahapias sia sing lana sa ngalan sang Ginoo; kag ang pangamuyo sang pagtoo magaayo sang nagamasakit, kag ang Ginoo magabangon sa iya; kag kon nakasala sia, patawaron ini sa iya. Busa magtinuaray kamo sang inyo mga sala, kag magpinangamuyoay kamo, agud nga mag-ayo kamo.” (Santiago 5:14-16). “Kay indi sa sidlangan ukon sa katungdan ukon bisan pa sa bagatnan nagagikan ang pagbayaw, apang ang Dios amo ang hukum.” (Salmos 75:7, 8). Ang Dios nagsogo sa mga kaanakan ni Israel nga nagasiling, “Manginwalay makita sa imo nga bisan sin-ong nagapaagi sa kalayo sang iya anak nga lalaki ukon iya anak nga babayi, bisan sin-ong magagamit sang pagpamakut, ang manuglagpat, ukon manugbabaylan, ukon diwatahan, ukon manugtiwtiw, ukon manugpagowa sang mga espiritu, ukon salamangkero, ukon mga manugpakot sa mga patay, kay ang bisan sin-o nga magahimo sining butang kangil-aran sang Ginoo.” (Deut. 18:10-12). “Sa gowa sang ginaharian sang Dios ang salamangkero, mga ido kag mga manugbabaylan kag mga makihilawason kag ang mga manugpatay kag mga diwatahan, kag ang tagsa nga nagahigugma kag nagahimo sang kabutigan.” (Bugna 22:15). “Dili kamo magliso sa manugpagowa sang mga espiritu ukon sa manugpakot; dili kamo magpangita sa pagdagta paagi sa ila; “Ako amo ang Ginoo nga inyo Dios.” (Leb. 19:31). “Kag kon magsiling sila sa inyo. “Pamangkot kamo sa mga manugpagowa sang mga espiritu kag sa mga salamangkero nga nagawiswis kag nagakibot, “Indi bala mga manugpamangkot ang mga katawohan sa ila Dios? Tungud sa mga buhi magapamangkot bala sila sa mga patay? Sa kasogoan kag sa pagpamatuud! Kon indi sila maghambal sono sining mga polong, sa pagkamatuud wala sa ila ang pamanagbanag.” (Isaias 8:19.20).

Sa ikaw nagabasa sining diotay nga tolon-an, ang Dios nagapakig-hambal sa imo, nagatawag sa imo sa paghinulsul sang imo mga sala, kag sa pagtugyan sang imo kabuhi sa Iya, apang ang espiritu sang pawikan ukon ba-o, nga ara sa imo tagiposoon, nagahimo sang tanan nga balibad sa imo sa pagpalantang sang imo na nga pagtapat padolong sa Dios, kag nga nagatinguha sia sa pagpuno sang imo tagiposoon sang kahangawa kag kahadluk, nga magasiling na lang ikaw. Ano ayhan ang igasiling sang akon katawohan kag mga abyan, sang kalibutan, kon ako magmatu-udtu-ud nga Cristohanon? Ano ayhan ang matabo kon indi na ako makabayle, nga sinalosalo kag kalibutanon nga kalipayan? Sa



baylo sang paglantaw sang dimatungkad nga kamanggaran nga yara sa kay Cristo Jesus, Iya makatilingala nga paghidaet, Iya dimasaysay nga kalipay, Iya himaya, walay kalamatyan nga kabuhi nga napun-an sang kalipay, ikaw nagsugud sa pagpanan-aw sang mga butang nga madula nimo ukon masakway “Kon tugutan nimo si Cristo sa pagsulod sa imo tagiposoon, samtang nga ang kahadluk sa tawo subong man sa kahadluk sa kamatayon nagabukot sa imo sa kahiulipnan sang yawa. Apang si Cristo nagkari sa pagluwas sang tanan nga sa kahadluk sang kamatayon naulipon sa bug-os nila nga pagkabuhi. (Heb. 2:14). Ang espiritu sang pagpatumbaya nagapatig-a sang imo tagiposoon tubtub magtig-a subong sang ka tig-a sang tukiba sang pawikan ukon ba-o.

5. ANG LEOPARDO – among tama ka bangis kag mapintas nga sapat. Dumot, kaakig kag ang mainiton nga balatyagon sa masonson among nagagahum sang tagiposoon sang tawo kag masonson nagapadolong sa pagpatay. Ayhan tilawan nimo, kag pahitoon ang pagpugong sinang mainiton nimo nga balatyagon, tubutub nga makagowa ini, magapahayag sia sa iya bug-os nga kabangis. Labing maayo pa ang pagbaton nga ara inang kabangis sa imo tagiposoon, kag magpangabay kay Jesus nga hilwayon Niya ikaw. “Karon dili kamo magkaakig sa inyo kaugalingon”. (Gen. 45:5). “Untati ang kaakig kag baya-i ang kasingkal! Dili ka magkaakig, ini nagapadolong lamang sa malaut nga buhat”. (Sal. 37:8). “Ang kasingkal mapintas, kag ang kaakig makalalandas; apang sin-o bala ang sarang makatindug sa atubangan sang kahisa?” (Hulu. 27:4). “Kay ang kaakig nagpuyo sa dughan sang mga buangbuang, busa kuhaa ang kaakig sa imo tagiposoon.” (Manug. 7:9; 11:10). Huklasa ang tanan nga kaakig.” (Kolosas 3:8).

Madamu nga talawan ang nagainum sa pagpabakud sang ila kaugalingon sa paghimo sang ila malaut nga buhat ukon sa pagtimalus, apang, “Ang ila alak amo ang dalit sang man-ug, kag mapintas nga dalit sang mga man-ug nga dalitan.” (Deut. 32:33). Ang pagtimalus matamis sa tagiposoon sang nga makasasala, apang ang Dios amo ang aton manugtimalus. Si Jesus nagsiling, “Higugma-a ang imo isigkatawo subong sang imo kaugalingon.” kag “Higugma-a ang imo kaaway.” Ang Dios sagsaad sa pagpatawad sang aton mga sala kon kita nagapatawad man sa ila nga nakasala batok sa aton. Ang mainiton kag masinuyayon nga espiritu kangil-aran man sa atubangan sang Dios. Ang malaut nga handum sa pagpatolo sang dugo kag sang pagkamaawayon ara sa sulod sang tagiposoon sang tawo, kag gani ang matuudtuud nga pag-



hidaet itanum gid sa tagiposoon agud ina magkabuhi sing dayon.

6. ANG MAN-UG — nagluib kay Eva sa katamnan sang Eden kag ginlaglag ang matam-is nga paghiupod kag malolo nga kaangtanan sa Dios. Si Satanas, ang nahulog nga manugtunda, nadala sang kahikaw batok kay Adan kag kay Eva, sang nakit-an niya sila nga manuggahum sa ibabaw sang kalibutan, nga nagakabuhi sa himpit nga pag upod sa Dios, nga nagtal-us kay Lucifer. Bunga sang kahisa si Lucifer nagplano sang ila kalaglagan kag nagmadilag-on sa pagguba sang ila makatilingala nga katayuyon kag pagkabuhi upod sa Dios. Ang amo man nga yawan-on nga kahikaw kag kahisa sa tagiposoon nga tawhanon nagalaglag sang kalipayan sa mga tagiposoon sang pila kon ila makit-an ang iban nga malipayon kag nagakabuhi sing malinong. “Ang kahisa (Kaimon) mapintas subong sang lulubngan (Sheol)”. (Ambahanon 8:6). Nagadala ini sing malaut nga mga panghunahuna sa tagiposoon sa paglaglag sang kalipayan sang iban, ini nagadol-ong sa pagpatay. Ini sing pinasahi nagakahanabu sa kabuhi sang mag-asawa. Sa palatikangan subong man sa iban nga sahi sang kabuhi ini nagabunga man sing indi masaysay nga kalautan, pagkakailo kag pagdumut. Bisan pa sa mga Cristohanon nga mga manugpangabudlay, mga manugwali kag mga ministro ukon mga pastor nagakahisa man kon ang Dios maggamit sang iban Niyang ulipon labi sang sa ila. Magahimo sila sing maayo kon magmainamdamon sila, kag magmapuno sila sang putli nga “gugma sang Dios nga napasagahay sa aton mga tagiposoon paagi sa Espiritu Santo,” basi nga kon ang ila pagkamapuslanon sa Dios kag sa ila alagdan madag-ta-an sining yawan-on nga espiritu sang kahisa.

7. ANG PAKA — ang nagakaon sang duta, nagapahayag diri sang mga sala, kadaluk kag gugma sa kuarta nga amo ang gamut sang tanan nga kalainan (1 Tim. 6:10). Isa ka sahi sang mga paka sa Congo nakit-an nga nagakaon sang mga subay sing madamu gid tubtub nga mabusdik ang iya tiyan kag mapatay. Ang daluk nga tawo indi maluyag magtan-ay sing pagbulig sa mga imol kag mga makaloolooy, kondi nagatinguha sa bisan ano nga paagi, sa bunayag ukon sa limbong, lamang nga makati-pon kag makaangkon sang kamanggaran sining kalibutan, nga sa katapusan may tuktuk kag sipit nga magapapas sini. Si Jesus Iya nag-siling, “Dili kamo magtipon sa inyo kaugalingon sing mga bahandi sa duta, diin ang sipit kag ang tuktuk nagapapas, kag diin ang makawat nagaguhab kag nagapangawat, kondi magtipon kamo sa inyo kaugali-

ngon sing mga bahandi sa langit, diin walay sipit kag tuktuk nga nagapas kag diin ang makawat indi makaguhab kag makapangawat. Kay kon diin ang inyo bahandi didto man ang inyo tagiposoon.” (Mateo 6:19-21).

Si Acan kag iya panimalay ginlaglag tungud kay ginhigugma niya ang bulawan, kag pilak, malahalon nga mga bato kag panapton (Josue 7). Si Judas Iskariote, ang gintoton-an ni Jesus, nagbitay sang iya kaugalingon bangud sa gugma sa kuarta nga naghimo sa iya sa pagtugyan sang iya Ginoo kag Agalon. Indi nga ang cuarta amo ang malain, bisan ang bulawan kondi ang gugma sa cuarta nga nagahukmong sa tawohanon nga tagiposoon.

Linibolibo sang mga lalaki kag babayi sang tanan nga sahi kag duag sang tawo nga naglaglag sang ila kabuhi kag ila panimalay tungud sang malain nga handum sa pag-angkon sang daku kag madali nga pagmanggad paagi sa sugal kag dalagku nga pustahanay sa palumba sang kabayo kag ido kag ibp. Ang handum sa pagmanggad sa matawhay ukon mahulas lang nga paagi nagadol-ong sa pagpangawat kag pagpatay subong man sa paghikog. Ang gugma sa cuarta kag ang kadaluk may madamu nga kaupod, subong sang gugma sa dungog, sang gahum, ayhan gahum sa panghimanwa sa paggahum sa iban, gahum sa pamalak sa pagumpit sa imol, gahum sa pagtuloohan, subong nga labing masidlahon tungod sa iglesia sa baylo sang sa Dios, nga nagahukum sang isang balaan nga nagatinguha sa pagsunod kay Cristo nga wala nagapakigimpon sa iya pinasahi nga iglesia (Markos 9:38). Si Jesus nagsiling, “Andam kamo kag maglikaw sa tanan nga pagkamahamakhamakon; kay ang kabuhi sang tawo indi sa kabuganaan sang mga butang nga maangkon niya”. (Lukas 12:15). Ang sugilanon sang buang-buang nga manggaranon nagasugid sing subong sini: ang ulumhan sang isa ka manggaranon nagpatubas sing madamu gid; kag nagpainoino siya sa iya kaugalingon, ‘Ano ang himoon ko, kay wala ako sing tiponan ang akon patubas?’ Kag nagsiling sia, ‘Amo ini ang buhaton ko; gub-on ko ang akon mga tambobo, kag magpatindug sing dalagku pa; kag dira tipunon ko ang bug-os ko nga patubas kag ang akon pagkabutang. Kag mag-siling ako sa akon kalag, kalag, may madamu ka nga pagkabutang nga natigana sa madamung tuig; magpatawhay kag magkaon, maginum, magkasadya.’ Apang ang Dios nagsiling sa iya, “Buangbuang! Karon nga gab-i ginakinahanglan sa imo ang imo kalag; kag ang mga butang

nga imo naaman, sin-o bala ang magatag-iya sa ila?” Amo man sia nga nagatigana sing bahandi sa iya kaugalingon, kag indi manggaranon sa Dios.” Lukas 12:16-121). “Kay ano bala ang mapulos sang tawo, nga makaangkon sang bug-os nga kalibutan kag madula ang iya kalag?” (Markos 8:36). Dili kamo maghimud-os nahanungud sa inyo kabuhi, kon ano ang inyo kaonon, ukon nahanungud sang inyo lawas kon ano ang inyo ipanaput . . . Sa baylo, tinguha-a ninyo ang ginharian sang Dios, kag ining mga butang idugang sa inyo . . . Kay kon diin ang inyo bahandi, didto man ang inyo tagiposoon (Lk. 12:22-34).

8. SI SATANAS – ang amay sang tanan nga butigon kag sang sila nga nagabutig, amo ang nagatulod sa tawo sa paghimo sang nanuhaytuhay nga mga sala, kag ang manuggahum sang tagiposoon. Si Jesus nagsiling, “Kamo iya sang inyo amay nga yawa, kag buot ninyo himoon ang kailigbon sang inyo amay. Sia manugpatay kutub sa gin-suguran, kag wala nagatindug sa kamatooran, bangud nga walay kamatooran sa iya. Kon nagabutig sia nagapamolong sia sono sa iya kinaugali, kay butigon sia kag amay sang kabutigan.” (Juan 8:44). Ang diotay nga butig subong man ina sang daku. May mga butig nga ginahambal, ginasulat kag ginabuhat. Ang salimpapaw, butigon man kay sa pagkamatuud nagapakonokono sia nga indi man sia amo. Ang Dios indi makabutig bisan man ang Cristohanon. (Tito 1:2). “Kon magsiling kita nga may pagpakig-ambit kita sa Iya kag nagalakat sa kadudulman, nagabutig kita kag wala kita nagakabuhi sa kamatooran.” (1 Juan 1:6). “Sa gowa yara ang mga ido kag mga manugbabaylan kag ang mga maki-hilawason kag ang mga manugpatay kag ang mga diwatahan, kag ang tagsatagsa nga nagahigugma kag nagahimo sang butig!” (Bugna 22:15). Ang Dios nagadumut sang binutig nga panaksi kag sang butigon.” (Hulu. 6:19).

9. ANG BITOON, nagasaysay sang kaisipan nga ara sa tagiposoon sang taga ka tawo. Diri, sia nga nadagtaan kag malaut, ayhan patay tungud sang padayon kag hungud nga pagpakasala; nabulag kag pinatalang, agud nga sia indi makahukum sang iya kaugalingon nga mga buhat. Ining malaut nga kaisipan kon kaisa mahipus kon kaisa matublagon. Sia nagasumbong sa dapat kontani magbalibad, kag nagapamalibad sa dapat kontani magsumbong. Ayhan najirohan sia sang nagabaga nga salsalon, kag nadulaan sang tanan nga pagtalupangud kag balatyagon paagi sa pagbiya (pagtalikod) sa pagtoo, nga nagatalupangud sa madaya

nga espiritu kag mga pagtolon-an sang mga yawa, nga nagahambal sang kabutigan kag pagkasalimpapaw (1 Tim. 4: 1, 2; Heb. 10:22).

10. ANG MATA – sang Dios nagatan-aw sang tagsa ka butang nga ara sa tagiposoon. Wala sing nalipdan sa Iya nagdabadaba ng mata, kag gani nahibaloan kag nakit-an Niya ang tanan nga tinago kag tinutuyo nga mga panghunahuna sang tagiposoon. Kon bala ang nahimo nimo nga malaut nga mga buhat sa gab-i nga tama kadulum, sa masiot nga katalunan, sa madalum gid nga kalog ukon bisan sa diin lang, ang Dios nakakita sina tanan. (Ang mata sa sining laragway nagakasibo sa pahayag sa nawong sang tawo).

11. ANG MAGAMAY NGA MGA DILA SANG KALAYO – sa palibut sang tagiposoon ginapahayag ang gugma sang Dios nga ginalibutan ang makasasala nga tagiposoon. Samtang nga ang Dios nagadumut sang sala Sia nagahigugma sang tawo kag wala nagahandum sang kamatayon sang makasasala, kondi nga sia maghinulsul kag magkabuhi. Si Jesus nagkari sa pagluwas sang mga makasasala. Daku ang kalipay sa mga langit sang isa ka makasasala nga nagahinulsul. Ang mga magamay nga dila nagapahayag man sang dugo ni Jesu Cristo, “ang Cordero sang Dios nga nagakuha sang sala sang kalibutan”.

12. ANG MANUGTUNDA – nagapahayag sang Polong sang Dios sa mga dinaya-an, napun-an-sala nga mga lalaki kag mga babay-i, nga sila maghinulsul kag magtugut sang kapawa kag gugma sang Dios nga magsulod sa ila nga tagiposoon.

13. ANG SALAMPATI – amo ang tanda sang Balaan nga Espiritu, ang Espiritu sang kamatooran nga nagapatulupangud sang sala, sang; gakamatarung kag paghukum. Yari ang Balaan nga Espiritu sa gowa sang tagiposoon sang tawo. Indi Sia makapuyo sa diin ang sala nagagahum. Kon ang laragway sini nga tagiposoon nagakaangay sang kahimtangan sang imo tagiposoon, magpanawag ikaw sa Ginoo, buksi ang imo tagiposoon sa Iya, kag tuguti ang kapawa sang Iyang Polong sa pagsilak didto sa sulod. “Magtoo ka sa kay Ginoong Jesu-Cristo kag maluwas ka.” Ang Dios handa, ho-o nagsaad Sia sa pagbalhin sang imo tagiposoon, sa paghatag sa imo sing bag-o nga tagiposoon kag bag-o nga espiritu sa sulod nimo. Ini ginapahayag sa ikaduha nga laragway.

## IKADUHA NGA LARAGWAY


Ini nga laragway nagapahayag sang nagahinulsul nga tagiposoon nga nagasugod sa pagpangita sa Dios. Ang manugtunda nagauyat sang espada nga amo ang Polong sang Dios, nga “buhi kag gamhanan, matalum pa sa bisan ano nga espada nga duha sing sulab, nga nagalapus tubtub sa nautlan sang kalag kag espiritu, sang mga lualutahan kag utok, kag nagahantup sang mga hunahuna kag mga tinutuyo sang tagiposoon.” (Heb. 4:12). Ang Polong sang Dios nagapahanumdum sa iya nga “ang bayad sang sala kamatayon,” kag nga “gintangdo sa mga tawo nga mapatay sing makaisa, kag sa tapus sina ang paghukum.” (Heb. 9:27). Ang bahin sang makasasala kag ditumuloo amo, ang ila bahin manginsa linaw nga nagadabdab nga kalayo kag azupfre.

Sa isa ka kamut sang manugtunda nagauyat sang bagol. Ini nagapahanumdum sa makasasala nga mamatay kita tanan. Ang aton lawas nga ginahigugma naton sing tama gid, ginapabayoan, ginapakaon, kag ginapatahum, ginahatagan sing daku nga pag-atipan kag pagtatap agud nga mabusog ang iya kailigbon nga unodnon kag mga ginahingamo, mamatay kag madonot, kaonon sang mga ulod ini, samtang ang aton kalag kag espiritu magakabuhi sing dayon, kag sa isa ka adlaw magaatubang sang hulukmanan nga lingkoran sang Dios.

Diri makita naton nga mga makasasala magasugod sa pagpamati sang balita sang Dios kag pagbukas sang iya tagiposoon sa gugma sang Dios. Ang Balaan nga Espiritu magasugod sa pagsilak sa madulum kag puno-sala nga tagiposoon. Ang kapawa sang Dios magsulod sa iya templo sa pagtabog palayo sang kadudulman. Kon ang kapawa sang Dios makasulod na, ang kadudulman magagowa. Ang sala, nga napa-hayag sa tanan nga nanuhaytuhay nga kasapatan, magapalagyo. Gani, hinigugma nga bumalasa, tuguti si Jesus, ang kapawa sang kalibutan, sa pagsulod sa imo tagiposoon, kag ang kadudulman kag ang buhat sang kadudulman magagowa sa imo tagiposoon subong nga ginapahayag sa sini nga laragway. Si Jesus nagasiling, “Ako amo ang kapawa sang kalibutan, ang nagasonod sa Akon indi magalakat sa kadudulman.” (Juan 9:12). Dili gid ikaw magmanginmadinalag-on sa pagtabog sang kadudulman sa imo tagiposoon sa imo lamang kinaugalingon nga pagpanikasug; sang imo kaalam ukon sang kaalam sang mga tawo lamang. Ang labing yano, labing pat-ud kag labing madali kag labing



mabungahon kag amo lamang nga paagi, among pagtugut kay Jesus, ang Kapawa, sa pagsulod kag ang kadudulman nga among sala magagowa sa imo tagiposoon. Ang bulan kag ang mga bitoon ayhan makahatag sa aton sing bulig sa madulum nga kagab-ihon, apang kon magsilak na ang adlaw, nian ang kadudulman subong man sang mga



## 2. ANG NAPATALUPANGOD KAG NATUGYAN NGA TAGIPUSUON

magamay nga mga kapawa madula. Si Jesus amo ang Adlaw sang Pagkamatarung, sang Sia nagsulod sa templo sang Jerusalem, Sia nagtabog sang tanan nga nagabaligya sang vaca, carnero kag mga salampati, kag nga ginpang-ula ang cuarta sang manugbaylo nga nagasiling, “Nasulat na, ang Akon balay tawgon nga balay sang pangamuyo; apang gin-himo ninyo nga lungib sang mga makawat” (Mateo 21:13). Ang imo


tagiposoon ginatuyo nga balay sang Dios, templo sang Dios. Sia luyag magpuyo sa sulod niya, patahumon ini, pun-on sang kapawa, gugma kag kalipay. Si Jesus wala lamang magkari sa pagpatawad sang aton mga sala, kondi Sia nagkari sa pagluwas sa aton kag sa paghilway sa aton gikan sa gahum kag pagdumala sa aton gikan sa gahum kag pagulipon sang sala. “Kon ang Anak maghilway sa inyo matuud gid nga manginhilway kamo!” (Juan 9:36).

### ANG IKATLO NGA LARAGWAY

Ini nga laragway nagapahayag sa aton sang kahimtangan-tagiposoon sang matuudtuud nga mahinulsulon nga makasasala. Sia nakakita na sang kadaku kag pagkamalahaladluk sang iya madamu nga mga sala nga sa amo si Jesus namatay sa ibabaw sang cruz. Sa nagatolok sia sa cruz kag sa Polong sang Dios nga ginapahayag sang manugtunda sa iya, nagboong ini sang iya namahinulsulon nga tagiposoon, kag sia natandug sing madalum gid, tinagiposoon nga naghinulsul kag nagbakho tungod sang iya madamu nga mga sala. Sa nakita niya ang daku nga gugma sang Dios nga napahayag sa kay Cristo Jesus, ini nga gugma nagtunaw sang iya tagiposoon ilabi na gid sang nagsugod sia sa pagtalupangud nga si Jesu-Cristo, ang Anak sang Dios nagkari sa pagkuha sang iya madamu nga mga sala, subong nga Sia sa kinabubut-on namatay sa salili niya sa pinakamalaut nga kahoy.

Ang kamatooran nga si Jesus ginbakol, ginpurungan sang tunukon nga purongpurong, nga ang mga mapintas nga mga lansang ginapalapus sa Iya mga kamut kag mga tiil kag namatay sa cruz tungod sa aton mga sala, nagdolot sing madalum kag sing maathag sa mahinulsulon nga makasasala, nagtay-og kag nagpahublag sang iya tagiposoon kag kabuhi. Sa nagabasa sia sang Polong sang Dios sa diin nakita niya ang iya kaugalingon subong sa espejo, sia nakatalupangud sing maathag gid kon daw ano ang iya pagpa-anod sing palayo gikan sa Dios kag nakalapas batok sa Iya mga kasogoan. Madalum kag diosnon nga kasubo kag paghinulsul sa atubangan sang Dios nga may mga luha kag mapait nga paghibi, si Jesus nagpalapit sa iya. Ang gugma kag paghidaet sang Dios nagpuno sang iya tagiposoon sa nagsugod sia sa pagtalupangud nga “ang dugo ni Jesu-Cristo, Anak sang Dios, nagatinlo sa aton sa tanan nga sala.” (1 Juan 1:7). “Ang Ginoo malapit sa mga boong sing tagiposoon.”

(Sal. 34:18). Liwat ang Polong sang Dios nagsiling, “Sa sining tawo nagatolok Ako, sa iya nga makalooloy kag mahinulsulon sa espiritu, kag nga nagakurog sa Akon Polong.” (Isa. 66:2). Ang Balaan nga Espiritu nagahutik sang mga Polong ni Jesus sa iya, “Anak, (Lalaki



### 3. ANG NAGAHINULSOL NGA TAGIPUSUON

ukon babayi) magkalipay ka, ang imo mga sala pinatawad na.” Samtang nagatan-aw pa sia sa cruz nagatoo nga ina tanan ginhimo tungud sa iya, nagsugod sia sa pagtalupangud nga ang kabug-atan sang sala nakuha na, kay si Jesus nagdala sang aton mga kasubo kag aton mga kalisdanan: nga “Sia ginpilas tungud sang aton mga paglapas, ginahanog Sia tungud sang aton kalautan; nga “ang Ginoo nagpapas-an sa Iya sang kalautan naton nga tanan.” (Is 1.53)

Ang Balaan nga Espiritu kag gugma sang Dios nag-angkon sang natinloan nga tagiposoon. Sang sia nagatolok bangud sa pagtoc sa cruz kag sa kay Jesus, nagsugud sia sa pagtalupangud nga ang iya mga sala ginapatawad kag tungud sini naka-angkon sia sang kasegurohan sa iya tagiposoon nga ang dugo ni Jesus, ang Anak sang Dios, nagtinlo sa iya sa tanan nga sala (1 Juan 1:7). Karon nakapat-ud na sia nga ang nagatoo sa kay Jesus indi mawala, kondi may kabuhi nga walay kata-pusan (Juan 3:16). Kay sa kay Jesus “may pagtubos kita paagi sa Iya dugo, nga amo ang kapatawaran sang aton mga paglapas, sono sa kamanggaran sang Iya bugay”. (Ep. 1:7). Ang makasasala nga mga kailigbon sang unod ginbuslan na sang nga handum sa pagkabuhi tungud sa Dios kag sa pag-alagad sa Iya. “Sia nag una sa paghigugma sa aton.” Sa baylo sa paghigugma sang kalibutan kag sang mga butang sang kalibutan, sia na naghigugma sa Dios kag sang mga butang sang Dios.


Gani, sa sining laragway, makit-an naton nga ang mga kasapatan nga nagapahayag sang sala ara na sila sa gowa sang tagiposoon, bisan nga si Satanas daw wala maluyag maggowa sa iya unang hulukmungan, nagabalikid nga nagalaum nga basi pa may kahigayunan nga makasulod liwat. Amo ina nga si Jesus nagpasaan sa aton sa pagpulaw kag pagpangamuyo agud nga magpalagyo sia, si Satanas, sa aton.

### ANG IKAP-AT NGA LARAGWAY

Ini nga laragway nagapahayag sang isa ka Cristohanon nga naga-angkon sang himpit nga paghidaet kag pagkatinubos paagi sa halad sang aton. Ginoog kag Manluluwas, si Jesu-Cristo, kag gani walay ginahimaya nga iban “luwas sa cruz sang aton Ginoong Jesu-Cristo, nga paagi sini ang kalibutan nalansang sa cruz sa akon, kag ako sa kalibutan.” (Gal. 6:14). Si Jesus namatay sa cruz agud nga kita man “mapatay sa sala kag magkabuhi sa pagkamatarung.” (1 Pedro 2:24), ang Cristohanon nalansang sa kalibutan Kita ginasogo sa pagginawi sa Espiritu agud indi ninyo mahimo ang kailigbon sang unod.” (Gal. 5:16).

Ang haligi sa diin si Ginoong Jesus ginga-id sa tapus nga naubahan Sia sang Iya panapton, napahayag sa sini nga laragway sang tagiposoon, subong man bulonal kag mga inugbalakol nga among ginbunal sa Iya sing mapintas gid. Sia ginbunal tungud sang aton mga sala kay “ang

silot sang aton paghidaet yara sa Iya.” Si Herodes kag ang iya mga katawohan nagyaguta sa Iya, kag sa tapus nga ginbunal nila Sia, gindasok nila ang tunukon nga purungpurung sa Iya olo – sa baylo nga purungan Sia sang bulawan nga purungpurung, kag ginapuyat sa



#### 4. GINLANSANG UPOD KAY KRISTO

Iya kamut nga too ang taun-ak sa baylo sang cetro sang isa ka hari kag magsolosatodo sa Iya atubangan kag ginyaguta sa pagsiling, “Mabuhay hari sang mga Judeo!”. Ginduplaan nila Sia kag ginkuha ang tabun-ak sa Iya, kag ginpakdol sa Iya olo. Sa tapus nila mahimo ang makahulaya kag mapintas nga pagyaguta sa Iya, gindala nila Sia sa gowa sang Jerusalem kag ginlansang sa cruz.



May madamu nga ginatawag nga Cristohanon nga nagapangamuyo sa mga simbahan, naga-ambit sang Panihapon sang Ginoo, magakanta sang kalantahon sang Dios, kag gid, bangud sang ila mga malaut nga buhat sa masonson nagalansang sang ila Manluluwas liwat. “Indi ang tagsatagsa nga nagasiling sa Akon “Ginoo, Ginoo, makasulod sa gin-harian sang langit, kondi ang nagahimo sang kabubut-on sang Akon Amay nga yara sa langit.” (Mateo 7:21-27).

Sa sini nga laragway makita naton ang puyo nga may cuarta ni Judas, ang nagtugyan kay Ginoong Jesus kag nagbaligya sa Iya tungud sa katlo-an ka panid nga pilak, kay ang gugma sa cuarta nagbihag kag nagbulag sang iya painoino. Ang suga, talikala kag iban pa, gingamit sang mga soldado nga nagdakup kay Jesus subong nga binilanggo sad-tong gab-i. Ang dais nga sa masonson ginagamit sa sugalan, ginagamit sang mga soldado sang ila ginpapalaran ang Iya mga panapton, niyan natuman ang Polong sang Dios nga natagna, “Ginbahinbahin nila sa ila ang Akon mga panapton, kag ginapapalaran nila ang Akon kunop.” (Sal. 22:18). Ginkuha nila ang tanan nga Iya ni Jesus, apang Sia ila nga ginsikway, nga nagasiling, “Kami indi luyag nga ini nga tawo mag-gahum sa amon.”

Kabilogan sang katawohan nagapaabut-abut sa pagbaton sang tanan nga pagpakamaayo gikan sa Dios, tanan nga ulan kag tanan nga init sang adlaw, apang indi sila maluyag magpasakup sang ila kaugalingon sa lubos nga kagamhanan sang Dios. Sa kalabanan, ang Dios maayo lamang sa pagbulig sa mga tinion sang kalisdanan kag katalagman.

Bangud sang bangkaw, ang mga soldado nagbuno sang Iya kilid kag tagiposoan, “Kag gilayon naggowa ang dugo kag tubig.” (Juan 19:33-37). Sa wala pa magpamalo ang manok, si Pedro nagpanghiwala na kay Jesus sing makatlo, apang sang olihe naghinulsul sia sing mapait gid nga may mga luha. Nagatuad bala ikaw kay Jesus paagi sa imo mga polong kag mga buhat? Ukon nagakahuya ka sa paghimo sini sa atubangan sang mga tawo? Si Jesus nagsiling, “Busa ang tagsatagsa nga nagatuad sa Akon sa atubangan sang mga tawo, ituad Ko man sia sa atubangan sang Akon Amay nga yara sa langit; apang ang bisan sin-o nga magpanghiwala sa Akon sa atubangan sang mga tawo, ipanghiwala ko man sia sa atubangan sang Akon Amay nga yara sa langit.” (Mateo 10:32-33).

Si Jesus nagsiling man, “ang wala nagapas-an sang iya cruz kag magsonod sa Akon indi takus sa Akon.” (Mateo 10:38). Bulahan sila nga nagatindug sa ibabaw sang Bato, si Jesu-Cristo!

Bantiling Ka nga Bato,	Nag-agay sa kilid Mo,
Papalipura ako;	Sa sala amoy bolong
Ang tubig kag dugo Mo	Hilwaya sa 'ya gahum.

## ANG IKALIMA NGA LARAGWAY

Ini nga laragway nagapahayag sang natinloan kag ginbalaan nga tagiposoon sang makasasala nga linuwas sang bugana nga bugay kag kalooy. Nahimo ini nga matuudtuud nga templo sang Dios, ang puluyan sang Dios, nga Amay, sang Anak kag sang Espiritu Santo, sono sa panaad ni Ginoong Jesu-Cristo, “Kon ang tawo maghigugma sa Akon, magabantay sia sang Akon polong, kag ang Akon Amay magahigugma sa iya, kag Kami magakara sa iya kag magapuyo Kami kaupod niya” (Juan 14:23). Ang Dios magapadungug, magapakamaayo sang tawo paagi kay Jesu-Cristo. (Lukas 1:52).

Ang tagiposoon karon nahimo nga totoo nga templo sang Dios. Ang sala natabug na sa gowa. Sa baylo sang nanuhaytuhay nga kasapatan nga ginagamhan ni Satanas, ang amay sang kabutigan, aton na makita ang Balaan nga Espiritu, ang Espiritu sang kamatooran ang nagapuyo sa tagiposoon. Sa baylo nga amo anay ang makangilil-ad nga hulukmungan sang sala, karon ang tagiposoon nanginmatahum, nagapamungang-kahoy ukon katamnan, nagapamunga sing mga bunga sang Espiritu, nga amo ang gugma, kalipay, paghidaet, pagbatas, pagkalolo, pagkaayo, pagtoo, pagkamapainubuson, pagpugong sang kaugalingon kag iban pa nga kalahamut-an sa Dios kag sa mga tawo. Sia na karon ang nahimo nga mabinungahon nga sanga sang Matuud nga Puno sang Uvas, ang aton Ginoong Jesu-Cristo. Ang tinago sang pagpamunga amo nga sia mag-angut sa kay Cristo, kag si Cristo kag ang Iya mga polong nagapabilin sa iya (Juan 15:1-10). Subong nga sia napun-an kag natugmawan sang Balaan nga Espiritu, may gahum sia sa pagdaug sang unod kag sang iya kailigbon kag sa paglansang sang daan nga tawo. Paagi sa gahum sang Balaan nga Espiritu ginpakatakus sia sa paglakat sa Espiritu kag pagdaug sang unod. Sia wala na nagakabuhi tungud

lamang sa iya nakita, nabatian, kag ginabatyag kondi bangud sa pagtoo kay ang pagtoo kay Cristo Jesus amo ang pagdaug nga nagalandas sang kalibutan. Sia na nagakabuhi nga sa kasegurohan kag buhi nga paglaum kag ginapabakud sang mahimayaon nga paglaum sang madali nga pag-



### 5. ANG TEMPLO SANG DIOS

pahayag sang aton Ginoong Jesu-Cristo. Sia na nagakabuhi bangud kag sa gugma sang Dios, nga nagapadayon sa walay katubtuban. “Bulahan ang matinlo sing tagiposoon kay sila makakita sa Dios” (Mt. 5:8). Si Haring David, walay sapayan sang iya tanan nga kamanggaran kag mga kadalag-an sa iya mga kaaway sa luwas, nakahibalo nga ang labing daku nga pagpakig-awayan ara nga nagabalingaso sa iya kaugalingon


nga tagiposoon, kag sang nakatalupangud sia sang iya dimatungkad sa sulod nga kinahanglanon nagpangamuyo, “Tugaha sa akon, O Dios, ang kasingkasing nga matinlo, kag bag-oha ang matarung nga espiritu sa sulod nakon” (Sal. 51:10). Walay isa nga makasarang magtinlo sang iya tagiposoon, luwas sa matuudtuud nga paghinulsul, magpalapit sa Dios subong sang ginhimo ni David, nagpangayo sa Dios sa pagtuga sing bag-o nga tagiposoon sa sulod niya. Ang Dios nagahandum gid sa paghimo sing bag-o nga butang sa imo nga kabuhi. Ang paglunob ukon pagtukap sang gisi sang imo baraghal nga panapton sang imo kaugalingon nga pagkamatarung upod sa walay unod nga mga panaad kag mga pagtapat indi gid makahimo sang imo tagiposoon nga bagay nga puluy-an sang Dios. “Iwisik Ko sa ibabaw ninyo ang tubig nga matinlo, kag manginmatinlo kamo. Hatagan Ko kamo sing bag-ong tagiposoon, kag ibutang Ko ang espiritu nga bag-o sa sulod ninyo; kag kuhaon Ko ang tagiposoon nga batobatohon gikan sa inyo unod kag hatagan Ko kamo sing tagiposoon nga unod. Kag ibutang Ko sa sulod ninyo ang Akon Espiritu, kag palakton Ko kamo sa Akon mga palatukuran kag magabantay kamo sang Akon pagsulundan kag magahimo sa ila!” (Eze. 36:25-27). Ini amo ang kahulugan sa Bag-ong Katipan sa diin sang Dios nagpat-in sini sa dugo sang Iya Anak, si Jesu-Cristo.

Sa sini nga laragway aton man matalupangdan nga ang manugtunda nagpakita liwan. Mga manugtunda ginpili sa pagpangalagad sa jla nga magapanubli sang kabuhi nga walay katapusan, kag magapahamtang sing dologan sa palibut nila sang mga nagakahadluk sa Iya. (Sal. 34:7; 91:11; Dan. 6:22; Mat. 2:13; 13:19; 18:10; Bin. 5:19; 12:7, 10).

Ang yawa makita man naton nga nagatindug malapit sa tagiposoon, subong nagabantay sang kahigayunan sa pagsulod liwat sa iya una nga puluy-an. Gani ginalaylayan kita sa pagbantay kag sa pagpangamuyo, kay ang aton “kaaway, ang yawa, subong sang lion nga nagaluyong, sa pagpangita sang iya tulukbon” (1 Pedro 5:8). Sa masami, si Sataras nagapaka-manugtunda sa kapawa, nagadaya sang dimabinantayon nga mga tumuloo sang mga kailigbon sini nga kalibutan, nagatinguha, paagi sa iya kamangtas sa pagtiplang bisan pa sang mga pinili. Apang kon, aton sumpungon ang yawa, sia magapalagyo sa aton. (Santiago 4:7).

## ANG IKAN-UM NGA LARAGWAY

Amo ining masubo nga laragway sang isa nga nagtalikod. Nagsugud ang isa ka mata magpirot, nagapahayag nga sia nagsugud sa pagbugnaw kag ginatuyo sa iya Cristohanon nga kabuhi, samtang ang isa niya



### 6. ANG NASULAY KAG NABAHINBAHIN NGA TAGIPUSUON

ka mata daw sa nahuya nga nagatolok sa palibut, nga daw nagapangaluyag sang kalibutan. Ang kapawa sa sulod naga-amatamat dulum, kag ang mga simbolo sa iya tagiposoon, nga nagpahayag sang iya pagkahanda sa pag-antus upod kay Cristo, nagbuhin kag walay kabakud. Sia nalibutan na sang mga pagsulay sa diin naga-amat-amat sia sa pagpa-



sugut, sa baylo sang iya pagpakigsumpong sa ila. Sa baylo sang pagpamati sang tingug sang Dios nagasugud na sia karon sa pagpamati sang malalang nga mga panugyan kag wala unod nga mga panaad sang manunulay. Bisan nga sia sa gihapon nagasimba, nga nagatago sang iya nga pagkakalibutanon sa idalum sang kunop sa pagtolooan, ang gugma sang Dios nagtugnaw sa iya tagiposoon. Nagmadinuhaduhaon na sia, natunga sa duha ka opinion. Nagsugud sia sa pagpangaluyag sang kalibutan, kag nagapakonokono sa paghigugma sa Dios. Ang bitoon sa iya tagiposoon, ang consciencia, nagadulum. Ang cruz wala na ginapas-an nga may kalipay, kondi nahimo nga kasaw-ahan kag kabug-atan. Ang iya pagtoo nagsugud sa pagpalaypalay, nagauntat sa pagpakighambal sa Dios paagi sa pangamuyo, wala na nagasapak kag nagatatap sang kahimtangan sang iya tagiposoon kag sa dagaynay naghatag na duog sa manunulay nga nagahukmong sa gowa sang iya tagiposoon. Ginakalipayan na niya ang pagpakibguylag sa kalibutanon nga mga kaupdanan labi sang sa paghiambitanay sa mga matuudtuud nga mga tumuloo.

Ang espiritu sang pavo, nagapahayag sang bugal, nagatinguha sa pagsulod. Ayhan nalimutan na niya nga naluwas sia paagi sa bugay lamang, kag nagsugud sia sa pagkabugalon nga Cristohanon. Ang pagpahuboghubog nagapanoktok sa ganhanan kag nagatinguha sa pagsulod liwan. Ayhan sa isa ka pinasahi nga kahigayunan, upod sa kalibutanon nga mga abyan, sa diin magakahuya sia nga kabigon nga pinasahi sia, isa ka luming, ukon dulag sa kadam-an, nga ang yawa magsiling sa iya nga ining isa ka hitabu indi maka-ano sa iyang espirituhanon nga kabuhi. Ginpabatyag sia sang unodnon nga panghunahuna kag lawasnon nga mga kailigbon. Ayhan nagsugud sia sa pagkalipay sa mga mahigko nga mga linahug, sa pagtan-aw liwat kag liwat nga malipayon sang mga mahigko nga mga laragway, kag ginakalipayan niya ang mga mahigko nga mga kaupdanan, nagamasonson sa mga baylehan, sa ginaduhaduhaan nga kalingawan, nga nagabaton sang malaut nga mga panugyan sang yawa nga nagsiling sa iya nga ina kinaugali lang kag isa ka pagpakasala indi sala.

Matuud gid man, indi naton mapaiway nga kon ang talonon nga pispis sang malaut kag mahigko nga painoino maglayang sa ibabaw sang aton olo apang nagsayup kita kon tugutan naton sila sa paghapon kag mag pugad sa aton tagiposoon kag magboto sa aton sing mga malaut nga mga buhat. Kon tugutan naton ang yawa sa aton kumalingking, pat-ud

nga sia magahugakum sang bug-os naton nga kamut, magayudyud sang kalag kag espiritu sa walay katapusan nga kalayo sang inpierno. Gani ang balaan nga pahanumdum sang Dios sa aton, amo ang pagpalagyo gikan sa mga kailigbon nga pinamatan-on kag indi magsugud sa paghampang sang mga sala, bisan sa ano nga dagway ina maga-abut. Palagyo pakadto sa kay Jesus, ang Manughilway kag Mandadaug.

Ang tawo nga makita sa sinining laragway nagabuno sang tagiposoon sa isa ka punyal, nagapahayag sang mga manugyaguta kag manug-umpit sang Cristianismo. Tungud sang mapasipalahon nga dila kag nagayaguta nga mga bibig ginabuno kag ginapilas nila ang mga tagiposoon sang mga Cristohanon — mga pagsumpong nga ang madinuhaduhaon nga tagiposoon indi sarang makadaug. Sia magasugud na sa pagkahadluk sa tawo labi sang sa Dios kag bangud sang kahadluk kon ano ang isiling ukon himoon sang tawo, manginulipon na sia sang tawo, kag magapahilayo sia sa Dios. Kasingkal kag malain nga balatyagon magapahayag sa mga tion sang kahul-anan kag kapas-lawan, kag magapanagil-ut sa pagsulod. Inang malaut nga man-ug sang kahisa, nga magapahayag kon ang iban maglabi kag madinalag-on kag manggaranon, magasulod sing tago, kag kon hatagan bisan diotay lang nga kahigayonan, magabukas sang gawang sang dumot kag bugal.


Tama gid ka hapus ang pagsulod sang gugma sa cuarta sa aton mga tagiposoon kon indi naton pagtalupangdon ang mga paandam sang aton Ginoong Jesu-Cristo sang Sia nagsiling, “Pulaw kag pangamuyo kamo agud indi kamo makasulod sa panulay” (Mateo 16:41). “Busa ang nagahunahuna nga nagatindug sia mag-andam basi nga mapukan sia” (1 Kor. 10:12). Isul-ob naton ang bug-os nga hinangib sang Dios, agud nga kita makasarang sa pagbatok sa mga daya ni Satanas (Ep. 6:11, 12).

## ANG IKAPITO NGA LARAGWAY

Ini nga laragway nagapahayag sang kahimtangan sang nagaisul nga tagiposoon sang tawo, nga sa tapus sia masanagan kag makaambit sang diosnon nga dolot kag nanginumalambit sang Balaan nga Espiritu, nahamulag sia. Ini nagapahayag sang kahimtangan sang tawo nga wala gid maghinulsul ukon nakatugyan sa Dios, walay sapayan nga ang kamatooran sang Evangelio, ginatawag nga “Maayong Balita”, ginapahayag kag ginpaathag sa iya. Ang tawo nga nagapatig-a sang iya

tagiposoon, ang Dios nagapakilooy sa iya; sia magalain kag magalain pa gid walay sapayan sang walay bunga nga pagpanikasug niya sa pagbalhin sang iya kaugalingon.

Nahanungud sang nag-isul, si Jesus gid nagsaysay sang iya sini



## 7. ANG NAG-ISOL UKON PINATIG-A NGA TAGIPUSUON

kahimtangan sang Sia nagsiling, “Kon ang espiritu nga dimatinlo sang nakagowa sia sa tawo, magalagaw sa mga duog nga walay tubig nga nagapangita sang kapahuwayan; kag wala makakita nagasiling sia, ‘Mabalik ako sa akon balay nga ginhalinan ko’ Kag kon mag-abut sia makita niya ini nga nasilhigan kag napahamtang sing nagakaigo. Niyan nagalakat sia kag nagadala sing iban nga pito ka espiritu nga malaut

pa sa iya, kag nagasulod sila kag nagapuyo didto; kag ang kaolihian sadtong tawo manginmalaut pa sang sa nahauna” (Lukas 11:24-26). “Nahanabu sa ila sono sa matuud nga hulubaton, Ang ido nagabalik sa iya kaugalingon nga suka, kag ang nayon nahugasan lamang sa pagtubog sa lunang” (II Pedro 2:22).

Ining mga Kasulatan nagasaysay sing maathag sang kahimtangan sang tagiposoon sang isa ka nag-isul kag sang wala maghinulsul nga makasasala. Ang sala, sa iya bug-os nga pagkamadayaon nagbalik liwan sa pagpuyo kag paggahum sa tagiposoon. Bisan ang iya guya nagapahayag, sing may kaathag, sang kahimtangan sang iya tagiposoon. Ang Balaan nga Espiritu, inang mabuot nga salampati, napilitan sa pagbiya sang tagiposoon, subong nga ang sala kag ang Balaan nga Espiritu indigid makaupdanay sa pagpuyo. Indigid mahimo sa tagiposoon nga mangintemplo sang Dios kag sa amo man nga tion lungib nga puluy-an ni Satanas. Ang manugtunda, ang Polong sang Dios, magataliwan nga masinulub-on, sa gihapon nagabalikid, nagalaum nga sia (lalaki-babayi) magahinulsul pa subong sang anak nga mausikon, “Kag ngaa ginahandum niya nga kuntani ang pagbusug sang iya tiyan sang mga algaroba nga ginakaon sang mga baboy; kag walay tawo nga nagahatag sa iya. Apang sang mahaulian sia nagsiling, sia, ‘Pila ka mga mamumugon sang akon amay nga may tuman nga kalan-on kag nagabugana, apang nagakapatay ako diri sa gutum!’ Magatindug ako kag magakadto ako sa akon amay, kag magsiling sa iya, ‘Amay, nakasala ako batok sa langit kag sa imo atubangan; indigid na ako takus nga pagtawgon nga anak mo; himoa ako nga subong sang isa sang imo mamumugon’ (Lukas 15:16-18). Ang amay, sang nagatan-aw sang iya mahinulsulon nga anak, nagpatawad sa iya kag nagpasaguli sa iya.

Ang tagiposoon sa sini nga laragway nagapahayag sang walay tanda sang matuud uud nga paghinulsul, walay pagliso sa Dios, wala nagapangita sang kapatawaran sa tiilan ni Jesus. Ang iya kaisipan subong sang daw nahirohan sang nagabaga nga salsalon kag ginapahipus. May mga dulunggan sia apang indigid makabati sang nagapakitlooy nga tingug ni Jesus. May mga mata sia apang indigid makakita sang kadadalan sang inpierno nga nagayaab sa iya tiilan. Wala na sia nagabatyag sang kahuya sa pagpadayon sing tayuyon sa iya mga sala. Si Satanas naglambut na sa paggahum sa iya tagiposoon kag nagalingkod subong nga hari sa iya trono. Mahimo nga sia magsugid subong nga sa gowa



mahipid kag talahunon nga may dagway nga religioso, subong sang ginpaputi nga pantion “apang sa sulod puno sang mga tul-an sang mga minatay kag sang tanan nga kahigkoan.” (Mateo 23:27).

Ang amay sang kabutigan nagapuyo sa duug sang Espiritu sang Kamatooran. Ang tagsa ka sapat, ang tagsa ka sala ginaupdan sang pinasahi nga demonio kag mahigko nga espiritu kag nagaluntad sa iya tagiposoon. Bisan nga maluyag sia maghilway sang iya kaugalingon gikan sa malaut nga manugpaantus, nagapadayon sila sa paggapus sa iya . . .” Ang nakalalis sang kasogoan ni Moises mapatay sa walay kalooy sa pagpamatuud sang duha ukon tatlo ka saksi. Daw ano pa kapait nga silot ang ginahunahuna ninyo ang takus nga pagihukum sa iya nga nagsikway sang Anak sang Dios, kag nagpadibalaan sang dugo sang katipan nga sa amo ginpakabalaan sia, kag nagpasipala sang Espiritu sang bugay?” Heb. 10:28; II Pedro 2:1-14).


Kon ini nga laragway nagakasinanto sa kahimtangan sang imo tagiposoon minamahal nga abyan, panawag sa Dios sa gilayon, gikan sa kaidadalman sang imo tagiposoon. “Sia sarang sa tanan nga tion sa pagluwas” kag sarang kag handa sa pagpatawad sang tanan nga sala kon ikaw magpalapit sa espiritu sang matuudtuud nga paghinulsul. Sarang Sia sa paggapus sang yawa kag sang tanan niya nga kasoldadosan sang kadudulman, kag sa pagtabug sa ila pagowa sa imo tagiposoon, kon ikaw lamang luyag nga magtugut sa Iya sa paghimo sini. Kari subong sang isa ka aroon nga nagpalapit kay Jesus kag nagsiling, “Kon buot Mo, mapaayo Mo ako.” Si Jesus nagsabat, “Buot Ako; mag-ayo ka.” (Markos 1:40, 41). Apang kon magpadayon ka sa pagpatig-a sang imo tagiposoon, kag maghigugma sang kadudulman sa baylo sang kapawa, walay paglaum, walay bulig, tungod ikaw nagapili sang kamatayon sa baylo sang kabuhi – “kay ang bayad sang sala kamatayon” (Rom. 6:23).

### ANG IKAWALO NGA LARAGWAY

Diri makita naton ang nagapatumbaya ukon nagapatig-a nga makasasala nga nagapadolong sa kamatayon, ang iya lawas ayhan puno sang kasakit kag ang iya kalag may bug-os nga kahadluk sang kamatayon. Si Kamatayon (Calavera) naga-abut nga wala ginapaabuta kag sa dinaluyagan nga tion. Ang maluib nga kalipay sa sala nagligad na, kag ang makahaladluk nga kamatooran sang mahal kag



makahaladluk nga bayad sang sala karon pagaatubangon na. Ang makahaladluk nga alantuson sa inpierno nagakuga sang ila nadaug. Bisan nga sia na karon nagahandum sa pagpangamuyo, nasapwan niya nga indi na sia makapakighiangot sa Dios nga ang Iya gugma iya nga ginsikway sing



### 8. ANG KALAGLAGAN SANG MAKASASALA

dugay na. Ang iya mga abyan sang una nagakahadluk sa pagpalapit sa iya higdaan, kag ang ila mga polong nga walay unod sa paglipay indi na makabulig sa iya karon. Ang manggad nga ayhan naangkon sa malain nga paagi indi makasugpon sang iya kabuhi, bisan makaluwas sang iya kalag, bisan makapahaganhagan sang kasakit sang iya kalag. Iya nasapwan nga indi na gid sia makapahamoot sa Dios tungud kay ang yawa indi makatugut sing kahigayunan sa iya sa paghimo sini.


Ang tagsa ka butang nga iya anay ginhigugma kag ginkabuhi, karon daw sa nagayaguta na sa iya kag ang iya dimatutum, ayhan dipinaliso nga nagatatap sa iya indi na makabulig, subong nga sia nagsikway sang bugay sang Dios kag nahulog sa idalum sang pagkatinagudilian sang kasogoan. Nagsugud sia sa pagtalupangud nga, “Makahaladluk nga butang nga mahulog sa mga kamut sang Dios nga buhi” (Heb. 10:31). Sia naglaum sa pagpakighusay sa Dios sa adlaw nga sia may kahigayunan, ukon sa nagatagumatayon na lang sia, apang karon natalupangdan niya nga tama na kaulihi. Linibo nga katawohan nagakapatay sa hinali, nga wala na gid sing kahigayunan sa pagpangita sa Dios sa gawang sang kamatayon. Gani nga kinahanglan gid nga pangita-a ang Dios samtang ng nga sarang pa Sia makit-an. Sa baylo sang magpamati sang nagalipay kag nagaluwas nga mga polong sang Dios, ining nagatagumatayon nga makasasala nga nagsikway sang bugay kag gugma sang Dios sang nagakabuhi pa sia, karon nagapamati na sia sang tingug sang iya Hukum, ang Manluluwas nga iya ginsikway nga nagasiling sa iya, “Palayo sa Akon, pinakamalaut, sa kalayo nga walay katapusan nga gin-aman sa yawa kag sa iya manugtunda.” (Mateo 25:41). “Gintangdo sa mga tawo nga mapatay sing makaisa, kag sa tapus sina ang paghukum” (Heb. 9:27).

### ANG IKASIAM NGA LARAGWAY

Ini nga laragway nagapahayag sang isa ka Cristohanon nga nakapadayon kag nakadaug sang kalayohon nga mga pagtilaw kag pagsulay. Samtang nga sia ginasulay sa tanan nga bagay, nagpabilin nga mabakud kag nagantus tubtub sa katapusan, subong nga labi ka mandadaug tungud kay Jesu-Cristo. Indi lamang nga nakapakig-impon sia sa Cristohanon nga dalaganon, kondi nagpadayon sia, nagadalagan nga mapainulubon, wala nagatolok bisan sa iya wala ukon too, kondi, “nagatolok kay Jesus nga Pangolo kag Manughimpit sang aton pagtoo” (Heb. 12:1, 2).

Si Satanas upod sang iya panong nagalilibot sa matinoohon nga tagiposoon, nagatinguha (sa walay bunga) sa pagpatalang sang anak sang Dios. Bugal, gugma sa cuarta, kaulag, kag iban pa, napahayag man sila. Sa baylo sang leopardo aton na makita ang asno. Kay sa masonson ang sala nagapalalit sa aton sa tuhay nga dagway, kag nagatago

sang iya kaugalingon sa idalum sang nanglainlain nga kunop ukon nglan. Apang mainamdamon nga Cristohanon makakilala sang sala bisan pa nga kon magpalapit sa idalum sang pagtuloohan, ukon subong manugtunda sang kapawa, kay ang Polong sang Dios kag ang Espiritu



## 9. ANG NAGADAUG NGA TAGIPUSUON

sang Kamatooran magadol-ong sa iya sa tanan nga kamatooran. Ang tawo, nga iya isa ka kamut nagauyat sang tagayan nga may alak, naga-  
saot palibut sa Cristohanon kag nagatinguha sa pagsulay sa iya sang mga kalipayan sang kalibutan. Ini wala gid, bisan kon san-o, sing bungz sa nakapanugyan nga Cristohanon, subong nga sia nalansang kaupod ni Cristo kag sa kalibutan. Ang ikaduha nga tawo sa laragway, nagabuno

sang Cristohanon sang patalum. Malaut-nga halambalanon, libak, yaguta kag pamahug paagi sa mga kaaway sang Dios — kag sa labing masonson paagi sa kono mga tumuloo nagabuno sing masonson sang tagiposoon sang matuudtuud nga tumuloo. Apang sia patay na sa kon ano man ang ginasiling sang mga tawo kag nagapasulabi lamang kon ano ang ginasiling sang Dios . . . . . Madumduman niya ang mga polong ni Jesus, “Bulahan kamo kon ang mga tawo magpasipala sa inyo kag maghingabut sa inyo kag maghambal sang tanan nga bagay batok sa inyo sing indi matuud bangud sa Akon. Magkalipay kamo kag magkasadya, kay ang inyo balus daku sa langit, kay amo man ang paghingabut nila sang mga manalagna nga nahauna sa inyo” (Mateo 5: 11, 12).

Sala, ang unod (aton kailigbon) kag ang yawa, masonson naginguha sang tanan nila nga mahimo sa pagpahamulag sang Cristohanon gikan sa gugma sang Dios. Apang sa daku nga kalipay kag pagsalig sia sa pagkamatuud makasiling, “Sin-o bala ang makapahamulag sa aton sa gugma ni Cristo? Ang kangitngitan bala, ukon kasakit, ukon paghingabut, ukon tiggulutum, ukon kahubo, ukon katalagman, ukon espada”? (Rom. 8: 35). “Wala, sa sini nga mga butang labi pa kita ka mandaug paagi sa Iya nga naghigugma sa aton.” (Rom. 8: 37). Sa nasukluban sang bug-os nga panaput sang Dios, sia sarang makatindug sa adlaw nga malaut kag sa pagdaug sang tanan nga pagsulay paagi kay Jesu-Cristo nga nakadaug sang tanan nga pagtilaw kag pagsulay, nga paagi sa Iya kita man makasarang sa pagdaug kag pagangkon sang purungpurung sang himaya.

## **ANG NAGADAUG NGA TAGIPUSUON**

ANG BITOON sang iya kaisipan maathag kag masilawon. Ang iya tagiposoon puno sang pagtoo kag napun-an sang Balaan nga Espiritu. Ang manugtunda, subong Polong sang Dios, nagapahanumdum sa iya sang malahalon nga mga panaad nga ginhatag sa ila nga mga nagadaug kag nagapadayon tubtub sa katapusan. “Ang nagadaug pakaonon Ko sang kahoy sang kabuhi, nga yara sa sulod sang paraiso sang Dios”. “Ang nagadaug indi masamad sang ikaduhang kamatayon.” “Ang nagadaug hatagan Ko sang mana nga tinago, kag hatagan Ko sia sing bato nga maputi, nga sa bato nasulat ang bag-ong ngalan nga walay makahibalo kondi ang nagabaton sini.” “Ang nagadaug kag ang naga-

bantay sang Akon mga buhat tubtub sa katapusan, sa iya-ihatag Ko ang pagbulut-an sa kapungsuran.” “Ang nagadaug panapton sing panapton nga maputi, kag indi Ko pagpanason ang iya ngalan sa tolong-an sang kabuhi; ituad Ko ang iya ngalan sa atubangan sang Akon Amay kag sa atubangan sang Iya mga manugtunda”. “Ang nagadaug, himoon Ko sia nga haligi sa templo sang Akon Dios; indi na gid sia naggowagikan sini, kag isulat Ko ang iya ngalan sa Akon Dios.” “Ang nagdaug, palingkoron Ko sia kaupod nakon sa Akon trono, subong nga Ako nagdaug man kag naglingkod kaupod sa akon Amay sa Iya trono.” (Bug. 2:7, 11, 17, 26: 3:5, 12, 21).

ANG BUKAS NGA PUYO SANG CUARTA nagapahayag nga indi lamang ang iya tagiposoon kondi man ang iya cuarta natugyan sa Dios. Sa baylo sang pagusik sang iya dutan-on nga pagkabutang, nagabulig sia sa mga imol, nagahatag sang iya ikapulo (ikapulo nga bahin sang iya kinitaan) kag mga halad ukon bisan pa sang tanan niya nga pagkabutang, sa Dios, ginagamit ang tanan sa himaya sang Dios.

ANG PINANID SANG TINAPAY KAG ISDA nagahalimbawa nga sia nagakabuhi sing matinlo kag mahaganhaganon nga kabuhi. Sia wala nagadagta sang iya kaugalingon nga lawas sang ilimnon nga makahulubog, ukon sa pakaon sang dugo, ukon sang mga nakuga, ukon bisan ano nga dimatinlo nga kalan-on. Wala niya ginausiki ang iya cuarta, bisan ginadagtaan niya ang iya lawas (nga amo ang templo sang Dios), sa pagmascada, mama, ukon sa pagtabako sang bisan ano, wala bisan ano nga drug (LSD, Marijuana) ukon bolong nga makahalalit, kondi nagakaon sang manamit, matinlo kag nagapaayo sang lawas nga kalan-on. Ang iya tagiposoon nahimo nga balay sang pangamuyo. Sia man nagatambong sa simbahan sa masami kag matinahuron, sa tanan nga sahi sang panahon kag bisan sa ano nga kahimtangan. May kaluyag sia sa pagpangamuyo kon sa balay-palangamuyoan ukon upod sa iya panimalay, ukon sa iya naligwin nga hulut, kay sia nakahibalo nga sia indi makakabuhi nga wala nagapakigupod sa Dios paagi sa pangamuyo.

ANG NABUKLAD NGA TOLON-AN nagakahulugan nga ang Biblia nabuklad nga tolong-an sa iya, kag ginabasa kag ginaton-an niya ini adlawadlaw, nagapangita sang kaalam kag kusug, kabuhi kag kapa-wa, ho-o, ang dimaisip nga mga manggad sa iya. Ini nanginsuga sa iya mga tiil kag espada ukon hinganiban nga ginagamit niya sa pagdaug sang kaaway. Ini ang adlawadlaw nga kalan-on nga espirituhanon nga



tinapay sang iya kalag, tubi nga nagapaumpaw sang iya kauhaw, pali-gusan nga nagatinlo sang iya kahimtangan, kag salaming sa diin makit-an niya ang iya kaugalingon.

Nahigugma sia sa pagpas-an sang iya cruz, kay nakahibalo sia nga wala sing purungpurung sa wala sing cruz. Subong nga nahibaloan niya nga sia nabanhaw kaupod ni Cristo sa bag-o nga kabuhi, ginapangita niya ang mga butang nga ara sa ibabaw, mga butang nga walay katapusan, mga butang nga dimakit-an. Nakahanda sia sa pagsugata sa Dios, kag subong sia sang kahoy nga natanum sa higad sang sapa; nga nagadala sing mga bunga sa iya panag-on; subong sang sanga sang matuud nga pinuno, nagapamunga sing madamu pa. Wala sia nagakilala sang kahadluk sang kamatayon, tungud kay ang himpit nga gugma sang Dios, nga iya nabaton paagi sa Balaan nga Espiritu nagpuno sang iya tagiposoon.

## IKANAPULO NGA LARAGWAY

Si Jesus nagsiling, “Ako amo ang pagkabanhaw kag ang kabuhi; ang nagatoo sa Akon, bisan mapatay sia, apang magakabuhi, kag ang bisan sin-o nga nagakabuhi kag nagatoo sa Akon indi na gid mapatay.” (Juan 11:25, 26). “Ang nagapamati sang Akon polong kag nagatoo sa nagpadala sa Akon may kabuhi nga walay katapusan; indi sia paghukman, kondi naglaton gikan sa kamatayon pa kabuhi” (Juan 5:24). Ang kamatayon dimakapahadluk ukon makapaantus sang Cristohanon. “Ang kamatayon ginlamon sa pagdaug. O kamatayon, diin bala ang imo pagdaug? O kamatayon diin bala ang imo sudlot? Apang salamat sa Dios nga naghatag sa aton sing pagdaug paagi sa aton Ginoong Jesu-Cristo “(Kor. 15:54-56).

Ang tawo nga nagakabuhi kag nagalakat upod sa Dios wala naga-kahadluk sang kamatayon. Kon ang tion sang iya pagtaliwan mag-abut, nagalakat sia sing malipayon, subong si Apostol Pablo nagsiling, “Ang akon handum amo ang pagtaliwan kag magpakigupod kay Cristo, kay ina labing maayo pa” “(Pilipos 1:23).

And Cristohanon ginahidlaw sa pagtan-aw sang guya ni Jesus, ang namatay tungud sa iya, kag nagtubus sa iya sa ibabaw sang cruz. Ang Balaan nga Espiritu nagapapahanumdum sa iya sang mga polong ni Jesus, “Dili malisang ang inyo tagiposoon magtoo karlo sa Dios kag

magtoo man kamo sa Akon. Sa balay sang Akon Amay may mada-  
mung hulut; kon wala, makasugid bala Ako sa inyo nga magakadto Ako  
sa pag-aman sa inyo sing duug? Kag kon Ako makakadto kag makaa-



### 10. ANG MAHIMAYAON NGA PAGPAULI

man sa inyo sing duug magabalik Ako kag dalhon Ko kamo kaupod gid  
nakon agud nga kon diin Ako didto man kamo” (Juan 14:1-4). “Ang  
wala makit-i sang mata, kag wala mabatii sang idulungug, ukon wala

mapainoino sa hunahuna sang tawo, ini gina-aman sang Dios sa nagahigugma sa Iya” (1 Kor. 2:9). Wala sing nagakabagay nga polong sa duta sa diin ang isa makasaysay ukon makapaathag sang himaya sang langitnon nga mga duug, gina-aman para sa ila nga nagalakat sa mga tikang sang aton Ginoong Jesu-Cristo diri sa duta.

Sa baylo sang makahaladluk nga calavera (kamatayon), ang manugtunda ukon ang sologoon sang Dios makit-an sa sining katapusan nga laragway. Nagahulat sia sa pagdala sa ginapakamatarung nga espiritu pabalik sa Dios. Ang kalag, ang espiritu ginahilway sa gapus sang mamalatyon nga lawas, kag magalupad agi sa nabuksan nga gawang sang langit padolong sa sabak sang Isa nga ginahigugma sang iya kalag, nga sa Iya sia nagkabuhi kag namatay diri sa duta. Ang malipayon nga Maayong Pag-abut nagahulat sa iya sa atubangan sang Dios sa diin paga-abiabihon sia sang iya Ginoo kag Agalon sa mga polong sang pagdayaw, “Ma-ayo gid, ulipon nga maayo kag matutum; sulud ka sa kalipay sang imo Agalon” (Mateo 25:21). Si Satanas wala na sing kagamhanan sa iya kay, “Bilidhon sa itololok sang Ginoo ang kamatayon sang Iya mga balaan” (Sal. 116:35). “Kag nabatian ko ang tingug gikan sa langit nga nagasiling, Isulat mo; “Bulahan ang mga patay nga nagakalamatay kutub karon sa Ginoo. Bulahan sa pagkamatuud, nagasiling ang Espiritu, agud nga magpahuway sila sa ila pagpangabudlay, kay ang ila binuhatan nagasunud sa ila” (Bugna 14:13).

## KATAPUSAN NGA LAYGAY

Minamahal nga bumalasa, kabay nga ang Dios magbulig sa imo sa paghatag sang imo tagiposoon sa Iya nga nagahigugma sa imo, kay Sia nagapakilooy sa imo subong, nga nagasiling, “Anak Ko (Lalaki-ukon babayi) ihatag sa Akon ang imo tagiposoon” (Hulu 23:26). Ihatag kay Jesus ang imo ginalapyo, walay paglaum, naga sakit nga tagiposoon, kag Sia magahatag sa imo sing isa ka bag-o nga tagiposoon, kag isa ka bag-o nga espiritu sa sulud nimo. Indi ka magpaluib sa imo madayaon nga tagiposoon, sa pagsunud sang iya mga handum, kay, “Ang nagasaling sa iya kaugalingon nga tagiposoon buangbuang; apang ang bisan sin-o nga nagalakat sing maalamon luwason sia” (Hulu. 28:26). Isikway ang mga sala kag magkapyot sa pagkamatarung, “Kay ang bayad sang sala

kamatayon, apang ang bunayag nga dolot sang Dios kabuhi nga walay katapusan kay Cristo Jesus nga aton Ginoo” (RO. 6:23)

Kag kamo nga nakatugyan sang inyo kabuhi sa Dios, “Sunda ang huwaran sang maayong mga polong nga nabatian mo sa akon, sa pagtoo kag paghigugma nga yara kay Cristo Jesus,” kay sa amo man nga katarungan subong sang ginsiling ni Pablo sa II Tim. 1:12, “Kay nakilala ko ang akon natoohan kag ginasaligan ko nga sarang Sia makabantay sang akon gintugyan tubtub sadtong Adlaw. Magtubo ka sa labing balaan nga pagtoo, pagpangamuyo sa Balaan nga Espiritu, magpabilin ka sa gugma sang Dios, nagatolok kay Jesus, ang Dalan, ang Kamatoo-ran, kag ang Kabuhi, aton Ginoo, Sia nga magabalik sa madali sa pag-baton sang taga-Iya— “Ang Hari sang mga hari kag Ginoo sang mga Ginoo”

Karon sa Iya nga sarang makabantay sa inyo gikan sa pagkapukan kag makapaatubang sa inyo sa Iya himaya sa walay dagta nga may kali-pay, sa isa lamang ka Dios, nga aton Manluluwas paagi sa kay Jesu-Cristo nga aton Ginoo, ang himaya, pagkahari, kagamhanan, kag pag-bulut-an, sa wala pa ang tanan nga tion kag karon kag tubtub sa giha-pon, kabay pa,” Judas 24, 25.

**A SPECIAL WORD FROM ANGP**  
**UN MONDE SPÉCIAL DE L'ANGP**  
**UMA PALAVRA ESPECIAL DA ANGP**

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from [www.angp-hb.co.za](http://www.angp-hb.co.za) or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de [www.angp-hb.co.za](http://www.angp-hb.co.za) ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialectos falados em todo o mundo, a saber: (África, Ásia, América do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de [www.angp-hb.co.za](http://www.angp-hb.co.za) ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a



**l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.**

**As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.**



**Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.**

**If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.**

**Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.**

**Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.**

**Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.**

**Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos**

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

E-MAIL: [info@angp-hb.co.za](mailto:info@angp-hb.co.za)  
[info@angp.co.za](mailto:info@angp.co.za)

**ALL NATIONS GOSPEL PUBLISHERS**

**P.O. Box 2191**

**PRETORIA**

**0001**

**R.S.A.**

**A Gospel Literature Mission financed by donations**  
**Une Mission de litterature evangelique financee de dons**  
**Missao de literatura Evangelica financiada por donativos**

(Reg. No. 1961/001798/08)